

# Homili 2 tahun mBah Mino

Yohanes Suyanto

2 Maret 2015

## Pambuka

Bapak, Ibu, lan sadherek sadaya, dalu punika kita ngempal wonten mriki saperlu nyenyuwunaken sukmanipun Bapak Petrus Samino ingkang sampun 2 tahun kepengker katimbangan dening Gusti. Kita boten badhe nambah-nambah kasisahan ananging ing kalodhangan punika saged kita angge sarana nambah semangat kita amrih kapitadosan kita tansah mindhak-mindhak.

Kita pidatos bilih Gusti sampun prajangi badhe maringi papan ingkang mulya ing kalanggengan, Kita ingkang taksih gesang tansah nyenyuwun amrih para sadherek ingkang sampun tinimbangan saged ngaso kanthi tentrem lan mulya ing kalanggengan.

Kita tansah dedonga amrih semangat kita lan ugi semangat kulawarga, pangajeng-ajeng kita lan ugi pengajeng-ajeng kulawarga tetep teguh tumuju dhumateng Gusti.

## Renungan

Dereng dangu televisi tansah nyiaraken kacilakan montor muluk Air Asia. Kathah kurban ingkang pejah lan malah ngantos sapriki wonten ingkang dereng kepanggih kuwandhanipun.

Kados pundi raos kita menawi sadherek kita wonten ingkang dados kurban? Sedhih

Babagan lair lan pejah kaserat wonten kitab Juru Khotbah bilih sedaya kemawon wonten wayahipun. Tangis lan gumujeng ugi wonten wayahipun. Menawi dipunpasangaken tetembungan kalawau lair-tangis, pejah-gumujeng. Wekdal bayi lair, jabang bayi nangis lan tiyang-tiyang sanes gumujeng. Wekdal tiyang pejah, tiyang-tiyang sami nangis nanging tetiyang ingkang pejah malah gumujeng.

Pepejah ateges wiwitan gesang langgeng ingkang kebak ing sukagambira. Pramila ingkang katilar dipun suwun boten sanget-sanget anggenipun sedhih, ananging sageda nglajengaken gesang miturut karsa Dalem. Gesang kita ing donya namung ngisi wekdal saking lair dumugi pejah, nanging gesang langgeng boten wonten watesipun. Kados pundi kita sedaya ngisi wekdal wonten ing ndonya?

Gusti sampun dhawuh "... dipadha tresna tinresnan ...". Gusti sampun prajangi bilih kabingahan sejati bdhe kita tampi menawi kita pinanggih lan manunggil ing Gusti. Kita saged pinanggih Gusti kanthi mirunggan menawi kita sembahyang, ngibadah. Manunggil kita kaliyang Sang Kristus boten namung ing salebeting keyakinan iman kita ing Panjenenganipun, utawi margi kita sregep sembahyang dhateng Sang Kristus, ananging ugi amargi tindak katresnan kita ingkang kita tindakaken dhateng sesami.

## Panutup

Bapak Petrus Samino sampun kawilujengaken Gusti, lan temtu panjenenganipun langkung rena menawi kulawarga ingkar tinilar tetep semangat mandhep mantep anggayuh kasaenan dhateng sesami.

Gusti Yesus, ingkang wungu mulya kapisanan sampun prajangi boten namung kangge mBah Mino ananging kita sadaya badhe kaparingan swarga langgeng. Pramila sampun samesthinipun kita nuhoni dhawuh Dalem kanthi tansah tresna tinresnan dhateng sesami. Mugi-mugi Gusti tansah maringi semangat pangajeng-ajeng lan kapitadosan. Gusti ngandika "Iki dhawuhku, dipadha tresna tinresnan". Amin.